



Uunga:

Isak Johannessen, Naleraq  
Inatsisartunut ilaasortaq

### § 37 naapertorlugu apeqquteqaammut nr. 16-imut akissut

Inatsisartut suleriaasianni § 37, imm. 1 naapertorlugu Inatsisartuni ilaasortap Isak Johannesenip, Naleraq, apeqquteqaataa Naalakkersuisunit 04.02.2026 tiguneqarpoq.

Apeqqutigineqartut ataasiakkaat naapertorlugit akineqartassapput.

1. Avannaata kitaatigut aqquiti ammarpata (Nord Vest Passagen) umiarsuarujussuit orsiaatit allallumi tamaana ingerlaalernissaat eqqarsaatigalugu, uumasut miluumasut ullumikkut upernaraangat najortagaat eqqissisimatitaaffiat, umiarsuit pajuttaatit aqquutigilerpassuk Naalakkersuisut qanoq periuseqarniarpat aammalu pilersaaruteqarpat?

#### Akissut:

Kalaallit Nunaata piniarnermik aalisarnermillu nappateqartup siunissaanut tunngatillugu apeqqutinut pingaaruteqartunut qujanaq. Avannaata kitaatigut aqquiti angallatinit aqquutigineqartarnissaanut maannamut immikkut periusissiorqarnikuunanilu periusissior-nissamut pilersaaruteqartoqanngilaq.

Silap allangoriartornerata malitsigisaanik issittup imartaani Avannaata kita ilanngullugu umiarsuartigut siunissami angalasarnissani tunngavissanik allannguisinnaanera Naalakkersuisunit arajutsisimaneqanngilaq. Issittumi umiarsuartigut angalasinnaaneq IMO-p Issittumi piumasaqaatai naapertorlugit pisarpoq, tassani umiarsuit sannaat, avatangiisunik illersuineq issittullu imartaani angalasinnaanissani aalajangersimasunik piumasaqaateqartoqarluni. Pisut ineriartorneri Naalakkersuisunit qanimut malinnaaffigineqarput pineqartumullu tunngatillugu Issittumi Siunnersuisoqatigiit aqquutigalugit toqqaannartumik suleqataallutik.

Issittup imartaani imaatigut angallannerup annertusiartornerata malinnaaffigineqarnissaanik oqariartuut Naalakkersuisut isumaqatigaat. Nunani tamalaani ineriartorneq eqqarsaatigalugu periarfissaqalemiartorlu nunatta soqutigisai taperserlugit nunani tamalaani Naalakkersuisunit oqariartuutigineqartassapput, taamaasiornikkullu siunissami aaqqiissuteqarnissani piniarnermik aalisarnermillu inuussutissarsiteqarnerput uummassusillillu assigiinngisitaartuunerannut illersuutaasumik iliuseqarnissaq qulakkeerneqarluni.

Inussiarnersumik inuullaqqusillunga  
med venlig hilsen

Jens-Frederik Nielsen

25-03-2026  
Suliap normua 2026 - 1591  
All. normua. 26361637

Postboks 1015  
3900 Nuuk  
Oq. (+299) 34 50 00  
Fax (+299) 32 50 02  
E-mail: govsec@nanoq.gl  
www.naalakkersuisut.gl

1